

O P E R I S

M I N E R A L I S

P A R S S E C V N D A,

1 bis

D E

Ortu & origine omnium Metallorum & Mineralium, quo scilicet pacto illa per Astra producantur
ex Aqua & Terra corpus sibi suscipiant & multiplici forma formentur.

In gratiam diligentium Naturæ scrutatorum, conscripta & in lucem edita

A

J O H A N N E R U D O L P H O
G L A U B E R O.

Latinitate donata.



AMSTELODAMI,

Prostant apud JOANNEM JANSONIUM,

C I O I O C L I I.

P R Æ F A T I O

Ad

L E C T O R E M.

Cum in priore nuper à me edito libello hujus de Metallorum generatione tractatuli mentionem fecerim, benevole Lector, neque illum temporis angustia pressus publicis typis hætenus adornare potuerim, utut ab infima supremaque conditionis hominibus flagrantissime desideratum; consultum judicavi aliis negotiis tantum temporis subtrahere, quo istum publico bono elaborarem, nullus dubitans, quin hac mea de metallorum generatione opinio cum cunctis Philosophis licet non conveniat, apud haud paucos viros perspicaces fidem sit & assensum impetratura. Quod hic prodo, phaleratis verbis, multisque circumstantiis vel aliorum scriptorum testimoniis non exhibeo, sed nuda atque genuina, in qua omnis veritas consistit, simplicitate: quam ob causam etiam hunc tractatulum prolixum esse nolui, sed compendiosissimo quoad ejus fieri potuit stylo meam mentem explicui: nemo verò me aliorum de metallorum generatione opiniones enervatum ire animum inducat, meamque mundo obtrusum: minime gentium: suum cuique relinquo arbitrium & libertatem alios qui hac de re scripsere monumenta inspiciendi, cumque meis scriptis conferendi, ut utra Natura & veritati magis congruere probetur luculenter perspiciat. Mihi hic nihil feritur honoris, quasi ultra communem sortem saperem, neque etiam quicquam metitur

emolumenti, quod hunc libellum concinno, verum hoc saltem sine fit & respectu, ut qui ante hac de Metallicis scripserim, hujusque præsertim de eorum ortu & nativitate tractatus mentionem fecerim prioribus meis scriptis lucem saltem conciliarem intellectuq; redderem faciliora: acerbissime enim, si vel unus ex scriptis meis in avia abduceretur, essem laturus, quin multis lucem exorituram confido, cujus ductu cautius quam antea factitatum sint tractaturi. Benignus & misericors Deus, noster omnium Pater, cujus miraculorum Calum & Terra plena sunt, pauperulis & inopibus suis filiis det quod in sanctissimi sui nominis gloriam, nostramque salutem cedat. Amen.



De Ortu & Nativitate metallorum.

Quod ad metallorum mineraliumque originem attinet, ex qua nempe materia primitus in terræ visceribus generata & ad tantam fixitatem devenerint, multæ variæque semper opiniones exstiterunt, ut arduæ hujus scientiæ tyro suspensus fuerit utri assensum daret & juxta quam Philosophiam suam institueret. Cumque in universo terrarum orbe in tot gentibus tot jam primæ quam ultimæ fortis homines, tam literati quam illiterati in hodiernum suam felicitatem ex metallis eruere satagant, neque absque vera eorum cognitione nihil quicquam proficui haberi possit quo enim quæso pacto quis imperfectum aliquod metallum in melius convertet, si ignoret, ex quibus illud partibus, in quas resolvendum sit prius quam nobiliorem adipisci possit formam, fuerit compositum; generationisque cognitio ad eorundem meliorationem impendio sit necessaria, paucis quid de eorum nativitate sentiendum perlustrabimus.

Licet universus ferè Philosophorum chorus, sed scriptis valde succinctus, obscuris & ænigmaticis Metalla superne astrorum vi in terræ visceribus generari contestet, sunt tamen, qui satis indoctè contendunt Metallis nullum omnino semen quale cæteris rebus Vegetabilibus & Animalibus inest, neque idcirco ullam sese propa-

gandi vim esse, sed ea in prima rerum creatione talia à Deo in terræ gremio producta esse. Sed hic nimis pinguis est & palpabilis hallucinatio, cui facillime quotidiana contrarium evincente experientia, obviam iri potest. Dum enim hæc à fossoribus in terra pervestigata in lucem eruntur, oculis abundè percipimus, ea etiamnum quotidie crescere, neque hoc motu supersedere, nisi vegetativa sua virtute vitæque externis accidentibus priventur: quod ipsum hanc opinionem erroneam esse convincit. Sunt qui Deum cum mundum conderet non ipsa metalla, sed semen duntaxat eorundem ad sui propagationem terræ matrici instillasse doceant: quod si sic; jam olim hoc semen sua vegetatione absoluta novam sui messem, cujus nulla uspiam vestigia exstant, præbuisset. Sciendum ergo longe diversam esse feminis metallici rationem, atque feminis Vegetabilium Animaliumque oculorum & manuum sensu perceptibilem.

Non enim metalla in rerum primordio simul sunt creata, sed temporis tractu ex Elementorum sinu genita: eisque ab omnipotente creatis hoc mandatum injectum, hæc vis insita, ut viribus suis omnibus rebus crescentiam conciliarent, quam ad rem alterum alterius minime carere potest congressu; Astra enim sive Ignis Elementum semen Metallicum è suis visceribus excludit, quod Aër deorsum in Aquam deferret, ubi sibi formam palpabilem sive corpus adoptat, quod terra complexa fovet, nutrit augetque de forma in formam donec ad perfectum metallum per-

perveniat, quod tandem tanquam mater maturum foetum in lucem producit: quæ metallorum conceptio & generatio à mundi natalibus originem trahens in ejus dissolutionem usque durabit. Elementorum enim energiâ nova indies generantur, & vetera vice versa corrumpuntur, id quod non in metallicis modò, sed & in Vegetabilibus Animalibusque manifestissimum est. Nam quod variæ herbæ & animalcula absque herbarum traduce animaliumque semine, sola Elementorum virtute in hanc scenam producantur nemo ibit inficias, cujus si opus esset multa documenta ponerem, sed de re omnibus notissima verba facere supervacaneum est; Quis verò idem in metallicis fieri posse non credet? Vivificam, prolificam atque omnium rerum seminalem vim Astris sive Ignis Elemento implantavit omnipotens, quam intra se non conclusam servat, sed divino jussu eandem mediante Aëre & Aqua in Terræ centrum agit & demittit. Qui radii ignei insito suo impulsu & vi progredi non cessant, nec tandem locum offendant, ultra quem pergere impossibile sit, neque diutius ibidem hære, sed resilientes per universum terrarum orbem inde à Centro usque ad circumferentiam dispersi Tellurem fovant & imprægnant; quod ni fieret, sed sideræ illæ virtutes in terræ Centro permanerent, nec unquam sursum remearent, nihil super terra germinaret: verum quia calor & quicquid ab igne est hac indole est præditum, ut pergat quousque potest, ubi ulterius ire non datur, repercutitur,

eque Centro in superficiem resultat : Quemadmodum in speculo conspicuum est, in quod cum solares radii incidunt nec compactum politumque metallum penetrare valent, sparsim retro aguntur, & sicubi ignei radii isti dum resiliunt in terræ porositate pinguem humiditatem corripunt, hærent, mutuaque mistione in palpabilem quandam essentiam coagulantur, ex qua pro natura puri vel impuri loci, purum vel immundum metallum suo accedente temporis spacio prognascitur, quia non eodem statim momento maturum fit metallum, sed semen metalli cum centralis ignis calore in terræ matrice sensim nutritur & augetur donec suam adipiscatur perfectionem, uti in Vegetabiliuni, Animalium generatione usu venit, quorum semen idonea matrice exceptum ex eadem paullatim incrementa sumit, donec obstaculis haud præpeditum prædestinatam perfectamque formam assequatur. Unde pro loci puritate metalla quoque variantur : Unicum enim tantum est semen ex quo metalla & Mineralia pullulant, verum locus aliaque accidentia causa sunt dissimilitudinis eorum, ut in sequentibus probatum reddemus.

Sed portentosum nonnullis fortè videbitur, quod in Terræ medio locum esse dico, quem nihil præterire vel penetrare possit, sed sistatur, grave maneat, leve verò retro feratur, quam sententiam paucis dilucidare opere pretium fuerit. In Mundi creatione, Elementis ab invicem nondum secretis, sed chaos existentibus, cum
Deus

Deus eorum separationem instituisse, locum quo ponderosior ejus massæ pars, quæ Terra est, secederet constituit, quod & continuò factum, quia omne grave, sive Terra suo assignato puncto, tanquam apes suo costru sese agglutinavit, ex quo hic tandem globus super quo habitamus, enatus est: mox quod proximum erat gravitate, Aqua à cæteris Elementis secessionem fecit, terræque superficiem ambiit, centrum cum terræ centro commune agnoscens, ita ut si terra non esset, ipsa Aqua primitus stabilitum ac fundatum Gravitatis punctum sive Magnetem circumdaret, sed quia Terra intercedit aquis pondere præcellens destinatum locum jure merito tuetur, undas dorso suo excipiens. Reliqua vero duo Elementa, levissimum nempe Ignem Deus similiter in suam remisit locum longissime ab inferiori Gravium globo remotum; alterum leve, inter Ignem & Aquam medium, Aërem, inter modò dicta duo medium esse voluit, ut sese jugiter contingentes, invicem circularent, foverent atque donec ipsa ad extremum dissoluta in suam unde prodierunt nihilum redigerentur sustentarent. Neque enim Ignis aëris expers arde- re, nec Aër absque Aqua conservari, nec hæc sine Terra nutrirî, neque hæc utpote mortua, quicquam in lucem edere posset, nisi Elementum Ignis semen suum prius spiritualiter ipsi instillaret, ubi postmodum corporeum & sensibile, quale omnibus crescentibus necessarium est, efficitur. Ne vero quod dixi, nempe Terram suam habere Centrum, omni rei impermeabi-

le; ad quod fiderei radii allidentes in arcum con-
 dentantur, retroque acti per totum orbem sub-
 limantur sive destillantur, ex quibus omne me-
 tallorum, mineraliumque genus adminiculante
 Terra & Aqua illis corpora impertiens pro-
 ducitur, commentitium videatur, sciendum
 est hanc Philosophiam invictis rationibus de-
 monstrari posse; quam non ego solum amplector,
 sed & alii complures, quos inter celeberrimus iste
 Sentivogius haud postremas tenet, qui in ter-
 ræ Centro vacuum esse locum scribit, in quo
 nihil requiescere possit: quod & ipsa Naturæ
 ratio evincere videtur, in cujus medio puncto
 necessario vacuum requiritur spacium, in quod
 sese omnes Astrorum vires effundant, in se mu-
 tuo agant & immensum æstus suscitent; nulli
 rei moram ibidem dantes & quietem, sed unde
 ipsæ siderum infractæ virtutes sensim retro cede-
 re coguntur, circumferentiam petentes, ubi se
 humidæ juxta atque puræ jungentes terræ factum
 metallicum excludunt, ut mirari non oporteat,
 quod ibidem intensissimus æstus dominetur,
 cum cuncta sidera, Sol, Luna, cæteri Planetæ
 cum innumeris stellis suas vires istuc certatim
 conjiciant. Si vel solius solis magnitudinem per-
 pendas, terrenum globum 64 superantem A-
 stronomorum calculo, ne dicam de aliis innu-
 meris maximis effluvia sua terræ gremio junctim
 ingerentibus, quam infandum & immanem
 æstus eas conferre credis, quæ in centro vires
 suas congregant, manifestas & efficaces red-
 dunt. Perpende modo, quantum unicus radio-
 rum

rum solarium pugillus valeat, concavo speculo, vel metallico bene polito annulo aliove instrumento exceptorum & in centrum coactorum. Concavum enim rite concinnatum speculum spithamalem tantum habens diametrum lignum aliudve combustibile corpus nullo negotio succendit; quod si diameter sit duarum spithamarum, Plumbum, Stannum, Bismuthum, aliaque facile liquabilia metalla ad solem liquat, 4 vel 5. spithamas habens Cuprum & Argentum fundit, Ferrumque ut super inçude cudi possit emollit. Si ergo hoc ipsa experientia demonstretur, quod radiorum manipulus collectus & in punctum coactus tantarum sit virium, metalla puta liquare, Mercurium verò, Antimonium, Arsenicum, Auripigmentum, Koboltum aliaque hoc genus volatilia & immatura metalla in fumum redigere, quid futurum censes, si radii 10 vel 20. orgyarum congregentur? cuncta metalla solo auro excepto, haud dubie staminis instar comburerent & in fumum eleverent. Quid sunt 10. vel 20. orgyæ si cum tot milliarium millibus, quæ soli tribuuntur, conferantur, cujus fervor, ut alias ingentes stellas taceam, si in unum locum (quod in terræ centro fit) compingatur, quam incomprehensibilem ibi æstus esse cogitas? Nihil profecto tam fixum erit, quod isti incendio resistat, quemadmodum etiam nihil ei reapse resistit, unde istud punctum necessario inane est, in quo nihil quiescere vel permanere potest.

Objicias, me multa quidem garrere, pauca vero

vero probare, quis enim unquam ibi fuit, tantamque cavitatem conspexit? Cui respondeo: quod etiam si nullus hujus rei detur oculatus testis, naturalis tamen Philosophia sufficiens præbeat testimonium, quo talem locum revera esse demonstretur. Nemo enim negat Solem stellasque motu suo terrenum globum circuire, suosque ipsi radios imprimere; quo dato cui nec sanus quispiam contradicat, concedas quoque oportet, istos quoque calidos & invisibiles radios innato impetu pergere, donec alicubi fistantur, & ulterius ire prohibeantur, quod in medioximo terræ puncto factitatur, vel omnes Philosophos, unanimi consensu calorem non retrorsum sed antrorsum semper ferri credentes mendacii insimules. En tibi evidens hujus rei exemplum: Crassæ alicui sive ferreæ sive æræ laminæ prunam impone, cum primum, inferius latus à penetrante calore incallescere sentis sublata pruna manu explora quam à nimio calore lædi percipies, explora & inferius laminæ latus quod leviter tantum calere observabis, post aliquantulam moram iterum explora calorem progressum esse deprehendes, laminamque infra calidiorem quam in superiore parte cui pruna incubuerat. Hinc calorem nunquam retrorsum, sed semper antrorsum ferri perspicue videbis. Quod si sic, Astralem calorem similiter non in terræ superficie hæreere sed ad imum usque Centrum penetrare nolens volens fatebere.

Instes: Si radii solis per terræ crassitiem ad ipsum

ipsum usque centrum descendunt, qui fit, quod ipsa tota inde non incalescat, vel saltem in tantum, quantum circa superficiem calet cum experientia suffossam terram non calere, sed frigere, nullosque calentes radios in ea deprehendi testetur. Responsum habe: dispersos solis radios non nisi istis in locis vires exerere, ubi colliguntur & sensibiles fiunt, cujus vestigia in ipsa superficie observare est, quæ eis tam celerem transitum non permittit, sed sua ex duritie lapidum densitate aliquandiu sistit & moratur, unde calor duplicatur & multipliciter augetur, ut ad præduras rupes atque scopulos tantus interdum ex indefinente & conferto radiorum confluxu & condensatione oriatur fervor, quo admota casu ligna vel stipulæ ardescant & deflagrent, quod in raro & poroso aëre, istos radios sistere non valente, ut ut soli propiore nunquam contingit. Quo enim altius in Aërem ascendas, eo intensius senties frigus; ut editissimi montes in calidis licet siti regionibus semper nivibus, glacie, geluque rigeant solo ad radices impensè calente, variosque fructus edente, quamvis à sole sit remotius: Cujus in vertice frigoris, inque radice caloris causa sola est radiorum solarium reflexio, ibi subsistentium, & multiplicatorum, quod in supremo aëre fieri nullo pacto potest. Hi radii cum primum superficiem terræ penetrarunt in superficie modò juncti & multiplices sensim debilitantur, ad simplicitatem redeuntes. Unde est ut globi terreni pars longius à centro distans haud plus

plus habeat caloris quam Aër in sublimi : si cui vero altius ac propius ad solem accedere daretur, calor ejus paulatim auctus apud ipsum solem maximus perciperetur. Similiter cum calore terreno comparatum, circa superficiem languidissimo, magis vero atque magis versus Centrum sui sedem & collectionem invalescente, ut adeo inter solem unde calor manat, Centrumque ubi totus collectus repercutitur media terra jure merito sit frigidissima.

Hujus veritatis certa demonstratio in promptu nobis est : Cum enim calidissimis æstatis diebus nubes aquosæ solito altius à ventis in aërem pelluntur, intensissimi frigoris vi pura putata fiunt glacies, quæ frustillatim ea forma quam ab aëre impressam accipiunt magno vegetabilium malo decedit, quod nos Grandinem dicimus, tanti frigoris, ut eam non diu manibus tenere sustineamus : nec raro aliquot dies in solis æstu jacet prius quam à calente aëre liquata in aquam revertatur. Si ergo in media aëris regione insigne frigus non esset, unde nubes istæ congelascerent ? Et quis novit, quantum sit frigus ubi aër in sui medio maxime friget ? tantum haud dubie, ut nullum in eo vivens vel oculi momentum superstes esse queat, sed in lapidem extemplo transmutetur : quemadmodum sæpe animadvertimus, terreas exhalationes in mediam frigidam aëris regionem alte erectas istic locorum coagulari, in durissima saxa compingi atque deorsum labi : neque solum lapides, aliquot sæpe libras pendentes, sed & metal-

metalla, imprimis verò ferrum magni ponderis, multarum conglomeratarum guttarum referens formam in isto aëris tractu ex siccis exhalationibus densari & concretum demitti: quæ de re apud alios prolixius agitur. Unde solares radios istis in locis quos liberè absque obstaculo permeant, nullum de se calorem edere, sed ubi solidam nacti materiam detinentur & figuntur, quoque durior est materia, eo majorem æstum causare satis liquet. Videris quoque lignum vel aliud porosum corpus nunquam ex sole tantum contrahere calorem, quantum lapis, nec lapidem, quantum metallum, juxta se invicem licet soli exposita, cujus diversitatis ratio sola in poris invenitur, quorum alia corpora plus, alia minus habent, calori celeriores transitum concedentia: Caloris enim, quod sæpe dictum, proprium est antrorsum properare quamdiu non impeditur, ægerrimè verò pedem retro ferre. Exemplum tam culinaris, quam solaris fulmineusve ignis nobis præbet: Siquis enim igni affidens metallum aliquod, sive clavis illud sit, culter vel moneta, casu in folliculo habeat, calor facili negotio raras vestes pervadens in metallum incidit, cui augescens adhæret, tantumque calorem conciliat, ut interdum manu teneri nequeat, vestem vero quamvis igni propiorem vix leviter afficit. Idem & in fulmine usu venit, cujus ignis quia rapidus advolat, spatium non habens obsistentium solidarum corporum poros pervestigandi, momento ea dissipat & dissolvit, porosa verò integra relinquit,

quit, cujusmodi fulmen non raro gladium in vagina vel æs in zona, receptaculo illæso colliquat; vel etiam animalium cava & medullosa ossa integra manente carne comminuit: cujus rei causa est, quod talis calor celerrime invadens, metallum sensim permeandi & calefaciendi spatio destituitur, neque etiam contra suam naturam remeare volens, debilius Elementum vi subigit & destruat: solus enim Ignis Elementorum validissimus est & potentissimus, cæteris tribus cedere nescius, sed cui cetera cedere coguntur, quo privilegio à suis incunabilis divinitus est donatus.

Similem solis, lunæ, cæterorumque siderum caloris occultarumque virium rationem esse statuo, tamdiu antrorsum efficacia sua properantium, donec quod non penetrent offenderint, ubi gradum sistentes, coacervatique retro ire coguntur, locum quærentes ubi quiescant & corporei evadant: nam summus in terræ centro calor nulli rei moram concedit, sed continuo affluentem in porosam & humentem terram repellit, ubi radii sublimati & occultati sensibile corpus induant, de forma in formam proficiunt, donec nullo accidente impedimento in perfecta metalla excoquantur.

Non vero credat, me hoc velle, quod in Centro terræ igneus iste sit locus, cujus in scripturis fit mentio, ubi malorum animæ discrucientur. Minime; quia de tali mihi loco nihil constat, nec quicquam scire cupio. Hunc quem describo locum naturalis Philosophia indigitat, istum

vero

vero S. scriptura subindicat, quem Theologis relinquo, quo impiam multitudinem ne sese cattervatim atque temere in eum præcipitet absterreant: verè enim impiorum pœnæ non tardabunt, sed suo tempore improvidos subitò oppriment; nemo istas interminationes spernat, Deus enim justus est, nec irrideri vult, cum perditus mundus minimè credet, veniet & rebus finem imponet. Quod vero igneus iste, impiis ab antiquo in pœnam præparatus lacus, si ipsum terræ Centrum non sit, haud longe ab eo abesse possit, faciliè credendum. Sancti Ecclesiæ Doctores & Patres istuc semper sensisse videntur, locum hunc Abyssum, Infernum, & Antrum appellantes: Spelunca certe est, Abyssus & igneus lacus, à quo nos Deus clementer servet.

Verum quia hic gehennalis ignis fit mentio, non possum quin infirmissimas putatitiorum quorundam doctorum opiniones de eo ventilem. Inveniuntur passim montes, ingentem vim flammarum, fumi, cinerum, lapidumque eructantes: In Europa est Ætna Siciliæ, in Islandia Hecla pone Norwegiam, Vesuvius Neapoli adjacens, pluresque alii in cæteris Terræ partibus, quorum pars indefinenter, pars certis intervallis ardent fumantque: quos multi pro fumariis habent Inferni, vel illius loci, in quem Lucifer cum suis asseclis ob superbiam à Deo sit coniectus, & ubi damnati cruciandi: Sed vero consentaneum esse non potest, quia isti arduentes montes naturalem habent originem &

causam incendii, paucissimis cognitam. Alicubi enim toti sulfurei reperiuntur montes, qui vel à Centrali, vel ab Elementalī fulminis igne, vel alio quovis casu incensi non possunt non ardere: & cum hujusmodi mons flamma semel concepta flagrare cepit, quis incendium restinguet? nemo, propter ignis magnitudinem, & accedentium pericula: sibi ergo permissus deorsum depascit, materia igni apta nunquam destitutus. Quod si quis hujusmodi montes aliquot secula, vel etiam ultra annorum millenarium arsisse ex veterum monumentis percipiens miretur, unde tantum pabulum isti incendio sufficiat: Sciat hoc commodè fieri posse, ut mons sine intermissione ardeat, non ob magnitudinem duntaxat terreni globi, in quo Cera montana sive bitumen, sulfur, similiaque ustibilia abundant, sed & ob nunquam interruptum astrorum motum, quo effluvia sua terræ infarcire, præterque mineralia combustibiles hujusmodi materias generare, ignemque augere & fovere non cessant.

Adstruere hoc conantur, eo quod statis temporibus prope istos montes lamentabiles audiri dicantur ejulatus, quos perditorum animas credulum vulgus jactitat. Sed nugæ sunt. Gemitus enim isti tunc tantum eduntur, cum montes multum ignem exturbare nituntur aliàs clementer ardentes & fumantes. Quam primum accolæ hos percipiunt, probe sciunt, se brevi ex monte cinerum, ignis, saxorumque segetem habituros, & ut discrimen quod incendium minatur

tur evadant , in procinctu esse satagunt. Ac plerumque magna sulphuris copia in vicinia paratur , unde sibi inopes victum acquirunt , illud fodiendo , ab impuritatibus repurgando , usibusque humanis præparando. Clamor verò iste nihil meo iudicio videtur esse aliud quam ignis , summo impetu arctos meatus , prædura saxa , & cavernas pererrans , horrendumque sonitum , quem vulgo Ejulatum vocant , produ-
cens.

Addunt , quod circa ignitos istos montes haud rarò sese spectra & spiritus conspiciendos dent. Verum est & hoc , atque in Natura fundatum ; sed non continuò eos cacodæmones & infernales spiritus esse debere probaveris ; Cum & aliàs in terræ visceribus diversi spiritus reperiuntur , & conspiciantur , fossoribus non insolita monstra , à quibus sæpenumero læduntur , vel etiam interficiuntur , luxantur vel inficiuntur : nonnunquam sunt innocui , otiosi spectatores , vel operariorum armis ludentes , vel etiam operas faciunt , loculos minimè replentes , utut se strenuè incumbere ostentent. Multifaria vero forma tales Spiritus apparent , sæpe equum referentes , canem , aliàmve bestiam , aliquando pumilo incurvo viro similes , sæpe cinerea monachali cuculla induti , frequentius magnæ felicitatis , divitumque fodinarum sunt indices , nonnunquam multa damna inferunt , maligno habitu fossores suffocando , vel præcipites in puteos dando ; ob quorum malitiam non paucæ ditissimarum fodinarum in-

cultæ esse coguntur, abditos thesauros pertinaciter tuentium. Pygmæi audiunt sive terrestres virunculi, diaboli vel infernales spiritus nec vocantur, nec sunt, sed terrestres spiritus, mira sub terra designantes: priores verò ardentes montes inhabitantes Ignei spiritus cluent, præter quos & Aquei & Aërei Spiritus traduntur. Quod autem Elementaribus hisce spiritibus mali spiritus se non subinde, misceant, & humano generi insidias struant, nemo negaverit: nunquam Satanas quiescit instar leonis rugientis obambulat, quærens quem deglutiat, cui vigiliis & orationibus juxta Petri præscriptum obviam est eundum. Hæc per parenthesin de spiritibus dicta sint, circa ardentes montes, vel in terræ profunditate degentes hominique multiplici forma conspicuis. Redeo ad rem, demonstraturus flagrantibus hisce montibus nihil cum centrali vel infernali igne commune esse, sed eos crassum & materiale ignem efflare; quod sic aggredior.

Primò, hujusmodi montes interdum ardere desinunt, solum fumum exspirantes, per intervalla copiosius, quandoque intermoriuntur & expirant, ignis pabulo deficiente. Centralis vero Vulcanus, quamdiu Sol lucet, stellæ micant, suasque virtutes in terræ Centrum demittunt, minui vel evanescere nequit. Quemadmodum nec infernalis ignis scriptura teste unquam exspirabit: quapropter iste, licet furiosissimus montium ignis neuter horum esse potest, sed merus materialis, incrementa & decremen-

ta patiens, pabulique defecta plane expirans est habendus. Adhæc, ignis istorum montium non impense calet, sed maximam partem obscurus fumat: adjacens vero tellus, aliquod milliarium spatio insigniter calefcit, ut citra pedum offensionem non diu insilere valcas. Aquæ quoque super illos vel ex illis defluentes ferventissimæ evadunt, sulfur, cujus bonam portionem intra se complectuntur, manifeste redolentes.

Præter hosce flammantes & fumigantes montes reperiuntur interdum & alia antra atque cavernæ, magnum quidem æstum, sed nullum neq; flammam neq; fumum spirantes, quæ est alia ignis species, de quo in Metallicorum Chronicis uberius tractatur, inter alia & hoc addentibus, quod aliquando in monte quodam ortus hiatus ingentem calorem emisit, noctu solum splendoris nonnihil versus cælum ascendentis, interdiu tantum exhalantem æstum observabant.

Hinc curiosus monachus inductus ahenum ferreæ catenæ alligatum in hiatum demisit, aurum quod liquefactum subesse credebat inde haustrus, quod cum ad ignis contactum accessit, è vestigio liquatum decidit, iste solam catenam retraxit: neque hoc experimento contentus, aliud ferreum crassissimæ catenæ ferreæ applicatum demisit, quod similiter cum bona catenæ parte instar paleæ deflagravit, magnoque strepitu & fragore sub fumi specie sursum ejiciebatur, monachus vero cum vitæ discrimine ægre evasit, auro in barathro relicto. Sed qualis hic ignis ahenum cum catena in fumum oculi ictu

redigens fuerit, non scilicet materialis, quia fumi expers, sed potius astralis, nullo negotio divinaveris.

Notissimum est fossoribus Centralem & gehennalem ignem per cavernas sæpe montium alta petere, ea calefacere, ibique metalla fovere & maturare, ad quas dum metalla investigando propius accedunt, tantum sentiunt æstum, ut vel inviti subsistere cogantur: hic verò æstus (quem quidem crescentium mineralium actio non infrequenter satis magnum excitat, maximam tamen partem) ab igne Centrali, & hic ab Astris ortum de ducit. Quo verò pacto & ratione Astra Centralem istum ignem & hic Mineralia atque Metalla progeneret, quanta possum brevitate imperitis declarabo. Res ergo sic habet.

Apud Mosen Genes. 1. legimus Deum cum mundum conderet ex confuso Chao Elementis primam dedisse originem, suum cuique locum assignasse, munusque obeundum injunxisse, qua verò ratione intercedente perpetua circulatione conserventur, omniaque ex iis generentur, naturalis Philosophia demonstrat. Eadem ergo hic prolixè tractare institutum non fert, saltem Metallorum ortum & nativitatem, quantum quidem mihi innotuit, compendio proponam, quo nimirum modo Genus metallicum suam ex iis trahat originem, incrementum & augmentum, cumque ad summum perfectionis apicem pervenerint, finem nanciscatur.

Paulo ante demonstravi Superius Elementum

tum Ignis Solem, puta, Lunam cum reliquis stellis invisibiles suas vires igneosque radios in terræ Centrum demittere, ubi congregantur & immensum calorem causant, neque quiescere permitti resiliunt, per universum globum disperguntur, variis eum mirabilibusque Crescentibus, quæ Philosophis Mineralia dicuntur imprægnant, fovant multifariisque formis perficiunt: Cujus rationem modumque hic paucis aperiam.

Omnis res spiritualis, ex quocunque demum corpore orta, invisibilis & impalpabilis, nec quicquam ex ea sola fieri potest, sed spiritus manere cogitur donec ipsi subjectum occurrat, ubi hæreat, uniatur, ejusque beneficio in corpoream naturam revertatur, pro subjecti, spiritusque puritate puram. Spiritus est loco seminis, subjectum vero terræ live matrici respondet, in qua ille in sensibile corpus suæ naturæ congruum excoquitur.

Sciendum vero longe diversam esse metallicæ conceptionis generationisq; rationem, quam vegetabilium Animaliumque. In plerisque enim vegetabilibus suam perfectionem adeptis, ulteriori propagationi Natura Semen elaborat, præstans finissimam herbæ partem, quod incunte vere idoneæ terræ mandatum, novam plantam priori unde ortum per omnia similem producit; qua actione nova semper ejusdem plantæ semina conservantur. Quamvis vero nonnullæ plantæ non semine, sed radice sua propagentur, perpaucae tamen illæ sunt, sed in quibus ipsa radix seminis

vicem præstat. Quod sicubi plantæ ex terra omni semine vel radice destituta nascuntur, Elementorum fit beneficio, quibus eadem inanem terram imprægnandi, plantasque producendi vis inest, qua illas in mundi primordio generarunt & protulerunt. Itidem & Animalibus duplex sui ortus obtigit: primus est proprium semen, quo propagantur; alter quorundam est animalculorum etiam absque spermate, sola putrefactione mutuaque Elementorum actione & passione in mundanam scenam prodeuntium.

Hi duo modi in Mineralibus quoque locum habent: alter universalis imprægnatio in mundi natalibus per Astra facta: alter vero quotidianus est. Et quemadmodum prima Vegetabilium, Animaliumque generatio longè est præstantior habenda atque hæc Accidentalisis & quotidiana: ita & Mineralium. Sicut etiam Vegetabilium aliud alio citius perfectionem assequitur, & interitum; ita & Metalla atque Mineralia: quoque crescunt celerius, hoc & citius intereunt, & contra. Utque rationale & mobile animal nobilitate & fixitate Vegetabile millies superat: ita & minerale suum ob fixitatem animal si immortalis anima careat, longe antecellit. Cumque Vegetabilia, Animalia & Mineralia fatali periodo finita corrumpuntur & in nihilum redeunt, singula Elementa suum sibi capiunt, Astra spiritum, terra corpus servat quod ante dederat, & principia rei ad sua quæque remeant principia, ex quibus in principio orta: atque hoc pacto perpetua rerum

mors

mors & regeneratio experientia teste existit.

De naturali loquor Philosophia, cum qua immortalem hominis divinitus inspiratam animam confusam nolo; quam tanquam divinum quid de æterna Dei immortalitate participare totus largior, eoque à cæterarum creaturarum ortu & interitu merito distinguendam. Usque omnia de & ex Elementis procedunt, ita & post sui interitum & principiorum dissolutionem eodem festinantia tandem cum iisdem peribunt, sola hominis anima, quia à Deo profecta, ab eodem tracta æterna esse potest: alioquin ob suam præstantiam fixitatemque reliquos cunctos ex Elementis prolatos fructus metalla præcellunt. Quicquid enim cito fit, cito etiam perit, eoque minus est permanens, Vegetabilia cum Animalibus cito fiunt & cito pereunt, Metalla verò tarde nascuntur & denascuntur, unde hæc sola ex tribus Regnis, Vegetabili, Animalis & Minerali fixissima & eminentissima censenda.

Dicat nonnemo, immensum tu metalla extollis, ego verò istis Animalia multis nominibus præfero sese moventia, proximeque ad hominem accedentia. Causa est, quod quid Vegetabilia sint, quid Animalia & Mineralia non intelligis. Intelliges autem si Terrenum Globum Magnum aliquod Animal esse, & ab antiquioribus atque novissimis Philosophis appellatum perpendaris: inter quem, Macrocosmum etiam dictum, & Microcosmum, hominem, maxima harmonia & similitudo per omnia deprehenditur & intercedit. Quicquid enim in Microcos-

mo est id in Macrocosmo videndum extare à multis pridem Philosophis est ostensum , nec hic cum tædio repetendum. Hoc solummodo quod ad scopum facit præterire non debui: videlicet: Si Terra magnum est Animal , & cum Homine comparabilis , Viva etiam sit , mobilis , proprietatibus animali similis sit oportet. In Homine septem principalia membra sese primo offerunt, Cor, Cerebrum, Epar, Pulmo &c. Mox Sanguis , Nervi , mollia duræque ossa , varii muscoli & ligamenta , quæ Anatomia oculis exhibet : foris pilis est vestitus , in quibus animalcula ; pediculi , pulicesque degunt. Eadem in Orbe, si magnum sit animal, inveniri debent, quod ab aliis jam factitatum silentio prætermittitur , hic tantummodo Vegetabilia & Animalia cum Metallis comparari posse probatur.

Qui concedit , laudatissimum sanguinem qui in venis hominis hospitatur , in eo verò vita , crinibus & in eos agentibus infectis esse longè præferendum , is nec metalla negabit arboribus, silvis, saltibusque cum toto Vegetabilium genere, quos animalia incolunt, longe præstantiora esse , tanquam pretiosissima orbis partem ex vivente Centralis ignis Corde originem trahentia. Centralis enim à superioribus astris , causatus & accensus Ignis Cordi animantis respondet, semper itidem calenti , calidisque ac vivificis spiritibus totum corpus conservanti. Et, quemadmodum sanguis venalis per totum animantis corpus ejus conservandi causa sese diffundit : sic & Metalla in terra. Si enim Centralis Cordis

ter-

terreni ignis spiritus tam potenter calentes de se non funderet, terram futuros, cuncta mortua essent & sterilia, nec quicquam germinaret, nunc vero fecunda est terra, arborum, fruticum, herbarum ad animantium conservationem feracissima. Suntque Vegetabilia cum Animalibus ex istis sese sustentantibus extima ac vilissima magni animalis pars, Metalla vero optimum sanguinem referunt. Sicut enim Venæ in corpore disseminantur, inferne crassum habentes truncum ex quo rami majores prodeunt, mox exiliores, ad extremum in ramulos, frondesque & venulas desinentes per omnia veram arborem referentes. Sic & metalla in Terræ ventre: Sidereæ enim vires per totum terræ orbem superne invisibiliter in Centrum delatæ, obque stupendum ejus æstus pedem figere non valentes, resiliunt, ex vacuo inquietudinis loco remeant circumferentiam versus ubi ex idonea humiditate solidum & compactum corpus metallicum constituunt, ex quo innumeri radii, venarum arborumve instar undique erumpunt, augefcunt & per totum orbem sparguntur, & summa metallicarum arborum cacumina & fastigia nonnunquam in supremam terræ superficiem sese extendunt, hominique manifestant, cum primis siquando in montibus insignis fit exundatio, aggerem abluens, solidique metalli nudatas venas generis humani bono oculis exponens.

Sed sunt & aliæ multæ viæ quibus metalla in lucem eduntur, nimirum, immensa incendia, si

si casu sylva pastorum incuriâ ignem concipit, ob intolerabilem æstum hincit terra & liquatum metallum effluit & detegitur. Vehementes etiam Terræ motus non raro illud produnt. Reperiuntur adhæc metallorum venæ cum profundæ cellæ & putei effodiuntur, vel aratro in agris eruntur, & venæ indicantur: validi fluvii abrepta terra & arena aperiunt venas, quarum fructus in ripis inventi venæ investigandæ ansam præbuere. Animantium opera illa etiam produntur: velenim equus pedum plausu submota terra venam nudat, quod apud Goslarium in Ramelsbergo accidit; vel porci glandes vestigantes fodinas effoderunt. Vel metallum purum instar calami in aërem se extollit, qua ratione prædives argenti fodina Kuttenbergæ in Bohemia per monachum mundo innotuit, qui in sylva deambulans, calamo argenteo è terra prominenti cuculla imposita in cænobio rem indicavit. Vehementissimæ etiam procellæ prægrandibus arboribus radicitus evulsis venas pandunt.

Sæpissime Coruscatio (die Witterung) venarum indubitata indicinam facit, cum à calente aëre accensa aliquo-usque instar cæruleæ flammæ procurrit. Neq; difficilis est indago processus venarum non adeo profunde latentium si advertas, jugiter enim calidum sulfureum vaporem exhalant ex quo non solum innascens gramen solito, tenuius est, sed & arbores super eis crescentes pumilæ sunt, pallidiora habent & tenuiora folia, quam aliæ alibi sitæ. Item, ubi ros, pruina vel nix celerius liquescit & evanescit, metallum

sub-

subesse indicio est, cujus calidi ex venis ascendentes vapores causa sunt.

Fallax vero & incertum enim indicium quod plerique ex corylea virga petere satagunt, quod ego multoties sum expertus. Hoc sit artis opus, siquis sub certa Constellatione metalla in igne conjungens in Electrum conflet, ex eo globulum fundat medio perforatum, cui furculus de corylo hujus anni ramusculis carens inferatur, quem recta extensum ante te circumferas ubi metalla esse conjectas, cum virga inflexa globus humum versus declinat, metalla subesse, nec laborem cassum suscipi indubitatum est. Hoc indicium ex naturali & infallibili Philosophiæ fundamento protectum aliis omnibus de metallorum inventionem artibus merito est præferendum. Nec est quod mireris: plurima enim sunt quæ nos fugiunt. Quis certo explicabit, cur Magnes ferrum attrahat, & calefactum succinum stramina, gramina, fila aliaque vegetabilia? tota terra imperscrutabilium miraculorum & arcanorum Dei plena est, quæ nobis diligenter sunt observanda.

Causas vero, quare tot Metallorum species, inter se tam dissimiles generentur, alii alias sibi fingunt. Plerique septem tantum metalla à septem Planetis produci statuunt, Plumbum nimirum à Saturno, Stannum à Iove, à Marte Ferrum, à Sole Aurum, Cuprum à Venere, Hydragryum à Mercurio, & à Luna Argentum, sed mihi verisimile non videtur. Quo enim pacto Sol, Luna, aliufve Planeta suum sibi peculiar-

rem locum in terræ profundo quæreret quo semen suum seminare, sibi conforme metallum procrearet ? Cum videamus nullum metallum solum è terra erui, sed semper cum aliis mistum. Nunquam enim Plumbum invenias cui plus minus argenti non insit : nullum stannum foditur vel eluitur quin Aurum Argentumque habeat. Omne Cuprum & Ferrum Argentum continet, interdum & multum Auri, quod à metallariis nec deprehenditur nec creditur : Neque unquam aurum absque argento vel cupro, argentum raro auri aliorumve metallorum expers reperitur. Quod si suum quisque Planeta metallum generat, qua via alterum accedit ? Hoc de istis tantum dicitur metallis, qui vel sola in venis suis continentur, vel granulatim per terram vel arenam, pura vel lapidi mista inveniuntur & eluuntur. Ista excludo quæ nonnunquam bina vel terna in sua quæque vena juxta se procedunt, & sibi invicem oneri sunt & impedimento, ut metallici loquuntur, decussatim sæpe feruntur, non rarò coincidunt unam venam facientes, mox separata in venulas varias dirimuntur. Sed si suum quisque Planeta Metallum crearet, utique suum etiam locum eligeret, aliumque suum nidum occupare, & opus inturbare non passurus.

Largiamur suum cuique metallum, quam vero stellam Bismutho, quam Cobolto, Antimonio & Zinco genitorem assignabimus, immeritò ex metallorum censu ejectis, sed magis quam Mercurius metallicis, ut quæ cum aliis metallis
fun-

funduntur & artificis manu usui elaborantur, quod Mercurio non competit. Nonnulla quidem sola in venis inveniuntur, puta Plumbum & Argentum : Aurum vero passim suum & ab omni minera repurgatum ex arena eluitur, sed nunquam argento cuproque carens. Stannum & Ferrum similiter ex arena & humo granulatim petitur nunquam suum, sed lapidi mistum grana hæc præstantissimum Stannum præbent (Seiffen-Zin Germ: dictum) ut plurimum plus auri continens quam aliud ex fodina erutum, quia dum eluuntur granulati isti lupilli (Zwitter vel Zwitterfräupen) multi immiscent se aurum continentes granati, & una cum stanno excoquuntur & liquantur. Sic & granula ferri subtilissimum ferrum fundunt. Mercurium vel currentem vel rubeo lapidi inclusum, sed arte excoquendum & vivificandum fossores inveniunt. Aliquando & Cuprum exiguis lapillis (Kräuplein) instar angulati pyritis (Kisij) reperitur. Aliàs cuncta metalla in suis mineris & venis montium crescunt, ex quibus maximo cum labore, sumtu vitæq; discrimine eruta à minera tundendo, lavando & conflando sunt repurganda. Sed qua ratione singula agnoscenda, exploranda, fodienda, contundenda, lavanda, fundenda, ab heterogeneis separanda celeberrimi & antiqui metallarij Georgius Agricola & Lazarus Erker plenissime demonstrarunt.

Concludo igitur, quod metalla & semi-metalla sive mineralia ex uno communi semine ortum habeant, sed per accidens in varias species & formas discriminantur. Astrorum enim virtutes

tes junctim in terræ Centrum delatæ, solæ non manent, sed invicem mistæ in montium cavernas pedem referunt, quietis quærentes locum ubi corpus sibi fabricent; qui si purus est, purum quoque metallum cuditur, sin impurus impurum; Estque talis locus Matrîci simillimus à masculo semen concipiendi quod in corpus efformet, foveat, & ad maturitatem excoctum perficiat, astrales vero spiritus virilis seminis vicem subeunt, quod accedente humida terra in cavernis, ut matrîce exceptum, nutritur, & in diversas formas metallicas & corpora palpabilia pro loci puritate effigiatur. Ex uno ergo semine accidentaliter varias metallorum species generari ex hoc etiam palam fit, quod Metalla dum adhuc sunt in fieri, sensim maturiora evadunt; magisque & magis meliorantur, & quotidiana experientia teste non tantum sub terra, sed & supra eam nobilitantur. Hinc est, quod fossores immaturam mineram, puta Bismuthum, Coboltum vel Zincam effodientes, argenti more examinantes & nil invenientes, sese æquo maturius venisse dictitent, quam aëri expositam post aliquot annos explorantes, multum argenti continere reperiunt.

Quocirca evinco, si commune metallorum semen semper matrîcem mundam & aptam nancisceretur, nec accidentaria impedimenta intervenirent, nihil aliud quam Aurum, summa Metallorum perfectio ex eo generaretur. Quodque hæc sit Naturæ intentio, quod inchoavit semper ad perfectionem evchere, solùm vero

aurum eam assequatur, cæteris omnibus imperfectis manentibus, sed gemina Alchymia eodem promoveri sequenti tertia parte luculenter demonstrabitur: si autem demonstrari non posset, imperfecta ad perfectionem deduci arte, industria & igni, credendum utique esset, singulis metallis suum semen vel planetam appropriatum. Si enim vulgare plumbum juxta vulgarem cupellarum probationem parum tantum argenti possidens, maturantium salium beneficio brevi digestionem istuc perfici potest, ut multum argenti, post longiorem vero digestionem vel fixationem, etiam Aurum, quod antea non inerat, de se fundat, evidenter perspicitur, Naturam non contentam, fuisse ut Saturnus talis maneret, sed ut argentum & aurum fieret, taceo quod & reliqua imperfecta corpora digestionem maturentur, ut fixum Argentum & Aurum de se præbeant. Simili modo metalla spuria vel mineralia, Antimonium Cobokum, Zincum, Bismuthum & id genus alia figenda sunt, ut probum Solem & Lunam in cupella post se relinquant, quod tertia pars planissimum faciet.

Vides ergo non esse naturæ culpam, quod tot imperfecta sint metalla, sed externis impedimentis imputandum; nam si in imperfectis Aurum in potentia non lateret, qua arte in actum deduceretur. Nullum ars Aurum argentumve creare valet, Natura potest, sed quod non citra Artis industriam super terra perpetrat. Cum hortulanus semen plantæque radicem exarescere finit, nec terræ mandat ut perficiatur, non seminis

nis est, sed hortulani culpa quod contra Naturam perire cogitur. Auxilio persæpe opus est Naturæ, ut in Animalium Vegetabiliumque fructibus patet cur non idem in Metallicis necessarium erit & utile, quibus artificis ingenium opituletur. Liquet ergo Naturam ex mineralibus inferioribusque metallis perinde aurum efficere velle atque ex infante virum, vel ex nuce arborem, & si secus fit, non ipsi, sed externis accidentibus imputandum.

Hiscæ me satis probasse confido, Metalla omnia ex uno semine vel radice prodire, inque eandem reduci posse; quod item Mineralia primis germinibus Vegetabilium, imperfecta Metalla, semi-adultæ plantæ, Aurum vero perfecto à Natura ad finem perducto semini vel fructui jure conferantur. Sed de universali metallorum ortu & generatione hoc intelligendum, quæ major earum pars suam in terræ profunditate ex centrali semine originem trahentes, in cavernis & venis crescunt, in varias formas concresecunt, magnisque impensis, periculis & laboribus inde effodiuntur.

Altera Generatio modo plane diverso peragitur, absque centrali, communi & propagato semine, sed in terræ superficie superiorum astro-rum operatione, quæ tamen minima metallorum pars generatur. Dictum, duplicem Generationis modum in Animalibus & Vegetabilibus Naturæ usitatam: sic & in Metallis. Prima frequentissima est, & notabilis, altera rara & insensibilis. Altera in Plantis fit seminis vel radice pro-
paga-

pagatione : altera influentia astrorum, Elementorumque vi de novo perficitur. Ut si aqua pluvia vase excepta in calore solis vel aëris exhalet, remanet terra quæ innata vi, absque feminis accessione varias plantulas, animalcula, vermiculos & muscas producit. Idem in metallis accidit, cum Sol vel aliud astrum in humidam terram operatur, congregantur vires astrales, & corporeæ factæ varia mineralia atque metalla secundum matricis humidæve terræ puritatem exhibent : ubi Aqua Matricis, Astra Patris feminisve locum occupant : quemadmodum nec in Centro ubi omnia sicca, metalla generari possibile est, sed longe à centro, ubi Aquæ terram humectant, quibus se centrales Spiritus jungere, inque corpora & metalla abire possunt. Siccus enim spiritus ob siccitatem se in corpus coagulare non valet, sed apto indiget, subjecto ex quo corpus sibi assumat, quod est Aqua. Quamprimum Spiritus sulfureus aquæ est mixtus, non amplius communis est Aqua, sed rudimentum & principium metallicæ generationis, à Philosophis Mercurii nomine insignita, non vulgaris illius jam metallici facti, sed Aquæ viscosæ, quam metallarii (*Gar* sive) fermentantem spumam cognominant, quæ commodo loco contenta, debitoque centri calore & humiditate fatur, temporis tractu in metallum maturatur.

Fit igitur hæc metallorum conceptio & generatio non in terræ modò profundo, mediantibus centralibus sursum latis spiritibus, sed & in superficie, astris invisibiles radios subtili & pingui

gui terræ infundentibus ubi servati corporei evadunt. Nam fidereus ignis nunquam cessat vites suas terræ infundere, variisque vegetabilium juxta atque Animalium, Mineraliumque foetibus prout matricem offendunt imprægnare, Neque hoc in terra solùm metallicæ generationis aptissima, sed & in aëre in densis nubibus idem moliantur: Siquidem non infrequenter videmus, non modo exilia animalcula, bruchos, crucas, ranas aliaque insecta, istic locorum concepta & exclusa, confertim cum pluviis descendisse, sed & fide dignis testimoniis constat plus quam centenarios lapides, ferri etiam massas conglomeratarum guttarum specie, egregie maleabilis ex aëre decidisse. Uti & varii Cometæ, aliæque igneæ substantiæ in aëre coacti accenduntur, materia absumpta emoriuntur, instar arsenicalis fumi delapsæ terram cum suis foetibus inficiunt, unde multorum lethalium morborum seges felicissime pullulat. Ipsum etiam fulmen & fulgur nil est aliud quam subtile nitrum accensum, quemadmodum & cum fragore cadentes lapides in aëre procreantur. Hinc patet, quod non modo Centralis ignis intima terræ ingravidet, verum etiam astralis ignis in superficie, vel in ipso aëre locum metallis creandis quærat, sed nuspiam aptiorem quam in venis & specubus telluris.

Multas vero esse de istis metallis opiniones, non in terræ visceribus, sed supra in terra vel arena granulatim inventis, sed plerasque erroneas minimè me fugit. Aurum ad ripas fluviorum reper-

pertum & clotum, non ibi generatum, sed ex montibus scaturiginum robore à venis auri avulsum istuc devolvi plurimè autumant; quod quidè verum esse possit, nonnunquam enim scatebræ exiguas auri flammulas secum rapiunt, hirsutis bestiarum tergoribus postea exceptas: omne vero aurum in omnibus fluviisque repertum fontium ope ex montibus eruitur, vero simile esse non potest, sed ibidem generatum est, quandoquidem, juxta rivum interdum aurum colligitur, à quo fontes longissime remoti, qui illud deberent: in editis etiam montibus aurum ex terra vel arena nunquam fontes conspicias colligitur cujusmodi ferè est omne aurum, quod Batavi ab Indianis centenis vel millenis marcis commercuntur, non ex fontibus fluviisque sed maximam partem in editis ab aquis elevatis locis ex arena conquistum. Qualia sublimia & sicca loca etiam in Germania extiterunt, ubi aurifera Terra ad amnes devehenda & ab auro separanda erat. Hodieque ubi granula zwitteri vel stanni eluuntur, non in profundis, sed circa montes dispersa, reperiuntur quoque auri grana, unà cum stanni liquari solita, unde tale stannum ut plurimum auro abundare solet, quod mihi experientia sæpius testatum fecit.

Causa cur aurum frequentius juxta amnes fluviisque reperitur, est, quia cum rapide feruntur, levio rem arenam avehunt, graviora auri grana post se linquentes, à quibus residua arena minori negotio abluitur: aurum vero quale hic in Germania est Rhenanum & simile ut plu-

rimum purum non est, sed argento & cupro mistum, neque semper suum sive finum instar metalli; sed gravis ac sulfurei pulveris instar cujus combustibili sulfure fusione accenso & ablato, aureum colorem teneritudinem, ductibilitatem & puritatem acquirit. Ex India vero allatum superficiale aurum plerumque majoribus minoribusve granulis suum (gediegen) sed non finum, aliud alio præstantius invenitur. Vidi aliquando apud mercatorem Belgam hujusmodi auri granum propemodum finum, vel caratorum 24. aliquot pendens latones: plerumque mediocrem arenam magnitudine æquant. Omnium finissimum censetur quod in Hungaria & Trans-Sylvania eluitur, quod ego Ducatis æquivalens exploravi.

Jam me demonstrasse puto non omne aurum in terræ gremio ab igne centrali generari, sed etiam in superficie vi astrorum superiorum: neque solum aurum, sed & alia metalla & mineralia, præcipue ferrum atque cuprum, frequentissime ferrum, quod passim rotundis vel angulatis lapillis abunde reperitur aureæ plerumque naturæ, quod publicè neglectum probe observandum erat: quales etiam sunt filices intus spadicei vel rubei, aureum ferrum continentes. Magna enim ferro cum auro familiaritas & amicitia intercedit, sub qua magnum arcanum latet, in tertia parte fusiùs explicandum.

Ad incredulos ulterius convincendos, metalla superne in humida terra citra centrale semen generari, hoc exemplum non inconyeniens: In
semper

semper udis & paludosis locis alstra superiora aptum habent generandi metalla subiectum, vel Belgio teste, ubi quotannis peculiarem cespitem vel terram igni pro lignis præbendam (Zurff dictam) effodiunt, quæ præter sulphur arsenicum etiam, ferrumque & cuprum continet, non tamen quævis, sed quæ ex profundissimis eruitur & Bascert vocatur: reliqua Zeen dicta præter sulfur & paucum arsenicum raro aliud quid habet altera vero sulfuris & arsenici plurimum, infuetis insalubris ignis: quæ quamvis 20. 30. vel 40. pedum altitudinem habeat, vix tamen ultra 5. 6. vel ad summum decimum pedem extrahunt, quia in profunditate, omni caret sulfure, focoque inepta. Quod si quando cespitem bituminosum exploraturi, paludisve altitudinem indagatur vel fundum arenosum petituri decumanis terebris aggerem extrahunt, quod profundius, eo minus sulfuris, & in imo nullum omnino deprehendunt. Unde istud sulfur, arsenicum, vel in terra latens minerale originem non inferne, sed supernè traxisse patet; plurima vero metalla in terræ penetralibus, paucissima prope circumferentiam produci, quorum semen in abyssu potentius, quam in circumferentia deprehenditur, viribus sidereis jugiter centrum versus festinantibus, transitumque non invenientibus, multo pugnantibus, urgentibus, æstumque ingentem causantibus; quorum percussione totus globus incalescit omnique mineralium genere gravidatur. Hoc ergo ratione cuncta mineralia & metalla tam in profundo quam in circumfe-

rentia ex subtilissimo semine astrali, idoneo humore, in quo sibi corpus fabricet, procreantur. Neq; quisquam miretur, quod ex insensibili subtilissimoque vapore calido, si cum humore jungatur, metalla generentur. Non de coelo delabuntur ipsa instar lapidis de tecto, spiritualia descendunt, & in terra naſcæ locum commodum mediante aqua corpus induunt, pondusque ex terra petunt: ut & reliqua Vegetabiliumque & Animalium Semina formam tantum, incrementum, vitamque non ipsum corpus suppeditare notissimum est.

Metalla vero sua ex vulgari corrente Mercurio Sulfureque ardente utroque semi metallo primordia habere præstantium falsissimum est fundamentum. Ex Mercurio quidem atque sulfure Metalla oriri certum est, at non vulgaribus istis, sed supra memoratis, astrali videlicet, sulfurea, calida, sicca & spirituali anima, terrestrique aqua viscosa, ex quorum mutua tanquam masculini & fæminini seminis conjunctione omnia Metalla nascuntur. Erronea isthæc opinio multorum in Mercurio laborum causa fuit, haud paucis omnia sua hac Philosophia dilapidantibus. Quot conati sunt Mercurum communem absque vel cum auro argentoque figere, & etiamnum conantur, ipsius in aurum argentumque convertendi spe, sed irritò conatu. Ipse cum damno sum expertus: quousque pervenerim, tertia pars indicabit. Nec pauciores ex metallis currentem mercurium elicere studuerunt, eum ut primam metallorum materiam in aurum argentumve fixuri, sed frustra:

stra: prout enim initium ineptum fuit, sic & finis perditus. Cum primis Saturni vel Antimonii Mercurium anxie sectati sunt, Philosophorum dicto forsitan seducti, Saturnum metallorum parentem in Mercurium reductum facili opera in aurum mutari dicentium, non vero currentem istum, sed aquam viscosam, instar metallorum primordii pro artificis arbitrio tractabilem & in quamvis formam mutabilem putantium. Nescio qui sic insaniant homines, Saturnum vel Antimonium in Mercurium currentem, facilioris fixationis spe reducere volentes, cum uterque nunquam currentes Mercurius fuerit meoque iudicio nunquam futurus sit. Dem, fieri Mercurium cui scopo utilior erit ipso Saturno, jam non fixior sed volatilior factus? Ipso Saturno purior est substantia Mercurius; ajunt eoque libentius cum Sol vel Luna amalgamatur & figitur. Haud quaquam. Concedam fieri ex Saturno vel Antimonio Mercurium, quod ego tamen credere haud valeo, quid lucratus fueris? Nihil omnino. Istuc vero & libenter credo, & sum expertus, Saturnus & Antimonium more Philosophico in Mercurium i. e. Aquam viscosam redacta, facillime cum Sole & Luna jungi, & vel absque ipsis figi; putatitium vero istum Mercurium Saturni in metallorum melioratione quicquam laudabile præstitisse nunquam videre contigit. Mercurium quidem currentem vulgaris Mercurius additione ex quovis metallo haud difficulter fieri posse expertus largior, quid vero ex isto commodi sit, illos percuncteris, qui rem

cum damno tractarunt. Si currens Mercurius metallorum principium existeret, in omnibus utique vel plerisque metallorum fodinis, aliquantula ejus portio reperiretur, sed quia non reperitur, necessario vanum istud figmentum est habendum. Naturam vero ex astrali spiritu, terrestrique aqua prima metallorum rudimenta formare omnes Philosophi uno ore contestantur, cum ajunt, omnem rem arte in illud ex quo primitus facta, reduci posse. Cumque metalla absque omni corrosivo in aquam viscosam restitui, hæcque debito calore vel digestionem in puriores melioresque formas metallicas transmutari potest, ex hac ista prodiisse indubitato est credendum, nec metalla modò, verum etiam multi lapides, resque minerales, sive metalla contineant, sive eorum sint expertia, sub vel super terra inventa, primitus eadem ortus sui initia habere, quemadmodum fossiles in arenariis montibus alias res effodientes casu in hujusmodi Guram incidisse vidi, cum adipis massam credentes, quorum unus ea secum domum lata calceos inunxit, quos postridie lapidea crusta obductos, ipsamque massam in durum lapidem abiisse deprehendit. Quod vero lapides etiam alia sed huc non pertinente ratione generentur, haud ignoro.

Metallum in primam materiam, Guræ similem, reductum in artificis est manu, ut quamcunque formam voluerit induat: neque unquam revera meliorari potest, nisi antea in primam materiam revocatum. In solido metallo, ex quibus illud partibus sit compositum animadverti nequit, resolutum vero illas prodit; Anima sua in

qua vita & tota dignitas hospitatur, extractione privatum, deinceps amplius non est metallum; absque liquabilitate metallica, friabilem, inanem terram referens: totaque bonitas in pauxilla animæ, siderei que seminis virilis quantitate latet, reliquum corpus mortua vilisque terra existit.

Tandem & hoc, quod meo de Auro potabili tractatu dixi, metalla etiam super terra creari sufficienter confirmat: Quod scilicet: non tantum radii Solares in variis subjectis collecti corporei fiant, sed & ignis culinaris calor idem similiter præstet, quod examen cupellarum, testatissimum facit, lector inspiciat locum. Nitrum aliaque salia in humida terra à sole evidenter producuntur quod in sicca nunquam fieret. Suisque in scriptis Philosophi de metallorum melioratione agentes semper Incerationis meminerunt, intentioni suæ apprimè necessariæ: in hoc opere humiditas est Patiens, Calor Agentis vices subit: id quod in Vegetabilibus, Animalibus æque ac Mineralibus observandum, ubi nihil absque debita humectatione ad perfectionem contingere, maturantisque caloris actionem tolerare valet. Quoque spissior & viscosior est aqua, hoc matriçi aptior est, avidiusque & celerius semen inibi hæret germinatque, quo vero tenuior, hoc quoque vegetationi seminis aptior est iudicando. Aqua per se metallum fieri nequit, nisi ab astris prius semine imprægnata, vegetanteque vita donata, quod semen cunctorum metallorum origo est, anima & vita: cujus quo sunt plus participes, hoc meliora & fixiora quoque esse

esse oportet. Sententiæ ergo huic firmiter adstipulor, Metalla suam animam, spiritum & vitam ab Astris tanquam semine universali nancisci, corpus ab Aqua universali Matre, proque ejus situ & puritate vel impedimentis corporum diversitatem, bonitatisq; gradus derivare; & ab homine, in cujus gratiam cuncta facta sunt, tanquam nobilissima creatura, magna aviditate impendiis periculisque ex magni Animalis visceribus eruta, in multiplices suos usus præparari & elaborari.

Hæc de Metallorum generatione sufficiant, quo vero pacto, si ad ultimum perfectionis terminum pervenerint, vel in crescentia sua impedita, decrescant & intereant, silentio non præteribimus. Res ita se habet.

Omniis creaturis certus est præfixus terminus, quo-usque perveniant, vel vitam proferant, quod prædestinatum tempus si præcidatur, metamque non assequatur, ex accidenti est, nec Naturæ imputandum. Multifariis fit rationibus, pro inimicorum in quos inciderit variante ratione. Aliis frigidus nocet aër, sistens crescentiam, ut in metallis videre est, à trunco avulsis, aërique expositis, non amplius crescentibus, sed qualia devulsa sive matura sint sive immatura manentibus: sin novam matricem nanciscantur, quemadmodum plantæ semen terram, denuo crescere & ad perfectionem festinare incipit. Aliis Aër vita est, ut Vegetabilibus & Animalibus, quo spoliata moriuntur & expirant. Piscibus Aër mors, Aqua vita est, bipedibus & quadrupedibus Mors & Interitus.

Quemadmodum singula Elementa suos quæque fœtus habent quos fovēt, ita & aliarum rerum destructores sunt, quod Metallorum ortus & interitus perspicue docet. Quamprimum enim concepta in terra crescere occipiunt, salinæ cujusdam naturæ participes fiunt, tanquam matricis, in qua vel ex qua postmodum perficiuntur. In qua quamdiu non interrupta manent, pergunt in quantitate & qualitate meliorata: quamprimum vero contrarium, Aër puta, vel Aqua communis obviat, in matrice progredi prohibentur & moriuntur, utriusque ob subtilissimum hoc Saldum in fieri sunt impatientissima: Sin Aër invadat, Vita eorum involatili sale consistens elevatur & ab Astris retrahitur: Si Aquâ irruat, soluta proluuntur, matrice à contrario Elemento destructa; unde talia in primo ente, instar embryonis, jacentia, & vel levissimæ corruptioni obnoxia metalla intereunt, destinataque ob deleteria accidentia perfectionem nunquam assequuntur. Quæ verò semicocta sunt, virilem ætatem propemodum consecuta, plus tolerare possunt, externisque injuriis melius resistere, quorum sal tenerum in sulfur abiit, a quæ aërisque corruptioni non amplius subiectum. Matura vero & perfecta, si à trunco non amputentur ex Terra extracta, à qua nullum amplius nutrimentum habent, sulfureo tegumento deposito, naturæque præsidio atque tutela abdicata decrepito, cul humidum radicale exiccatur, rectè respondent, ab eodem; unde fata, sale astrali vel vehementi coruscatione dissoluta depascun-

eximiam artem & scientiam ineptus redditus in vultus sudore metalla ex terræ penetralibus protrahere, vitamque curis & laboribus transfigere cogitur.

Atque sic hunc de Metallorum generatione tractatum concludens, lectorem prolixiora desiderantem ad tertiam Partem remitto, quid propriè sint metalla, quomodo ab invicem distinguenda, absque corrosivis recludenda, in primam materiam reducenda, ignisque & artis beneficio nova melioraque metalla ex ista prima materia sint generanda accurate docentem. Quomodo etiam longè meliori modo sint examinanda, purganda, à se invicem seperanda; tum & Paracelsi expertissimi Philosophi libellum Cœlum Philosophorum sive Librum Vexationum, quantum mihi permittitur, explicantem; quo debitus, sed à malevolis obfuscatus honos ei postliminio restituatur, totusq; mundus cognoscat, ipsum in Naturalibus experientissimum fuisse, fideli calamo scripsisse, lumenque ingens licet à paucissimis observatum, nobis reliquisse. Cujus augendi, propagandi, contraque veritatis olores tuendi gratia tertiam Partem proximi bono aggredior, cui conatui omnium rerum conditor, veritatisque Patronus clementer aspirare dignetur, Amen.

F I N I S.

